

МОНГОЛ УЛСЫН ХУУЛЬ

2026 оны ... дугаар
сарын ...-ны өдөр

Улаанбаатар
хот

**СТАНДАРТЧИЛАЛ, ТЕХНИКИЙН ЗОХИЦУУЛАЛТ,
ТОХИРЛЫН ҮНЭЛГЭЭНИЙ ИТГЭМЖЛЭЛИЙН ТУХАЙ**
(Шинэчилсэн найруулга)

**НЭГДҮГЭЭР БҮЛЭГ
НИЙТЛЭГ ҮНДЭСЛЭЛ**

1 дүгээр зүйл. Хуулийн зорилт

1.1.Энэ хуулийн зорилт нь стандартчилал, техникийн зохицуулалт, тохирлын үнэлгээ, тохирлын үнэлгээний итгэмжлэлийн эрх зүйн үндсийг тогтоож, бүтээгдэхүүн, үйлдвэрлэл, үйлчилгээний чанар баталгаат байдлыг хангахтай холбогдсон харилцааг зохицуулахад оршино.

2 дугаар зүйл.Стандартчилал, тохирлын үнэлгээний хууль тогтоомж

2.1.Стандартчилал, техникийн зохицуулалт, тохирлын үнэлгээний итгэмжлэлийн хууль тогтоомж нь Монгол Улсын Үндсэн хууль, энэ хууль болон эдгээр хуультай нийцүүлэн гаргасан хууль тогтоомжийн бусад актаас бүрдэнэ.

2.2.Монгол Улсын олон улсын гэрээнд энэ хуульд зааснаас өөрөөр заасан бол олон улсын гэрээний заалтыг дагаж мөрдөнө.

3 дугаар зүйл.Стандартчилал, техникийн зохицуулалт, тохирлын үнэлгээний итгэмжлэлийн зарчим

3.1.Стандартчилал, техникийн зохицуулалт, тохирлын үнэлгээ, тохирлын үнэлгээний итгэмжлэлийн үйл ажиллагаанд дараах зарчмыг баримтална:

3.1.1.хууль дээдлэх;

3.1.2.хүний амь нас, эрүүл мэнд, нийгмийн болон хүрээлэн байгаа орчны аюулгүй байдлыг хангасан байх;

3.1.3.сонирхогч талуудын оролцоог тэгш хангасан байх;

3.1.4.баримт нотолгоо, шинжлэх ухаан, дэвшилтэт технологи, инновацид суурилсан байх;

3.1.5.бие даасан, хараат бус байх;

3.1.6 ил тод, нээлттэй байх;

3.1.7.ашиг сонирхлын зөрчлөөс ангид байх;

3.1.8. хуульд заасан үндэслэл, журмаас гадуур аливаа хэлбэрээр саад учруулахгүй байх;

4 дүгээр зүйл.Хуулийн нэр томъёоны тодорхойлолт

4.1.Энэ хуульд хэрэглэсэн дараах нэр томъёог доор дурдсан утгаар ойлгоно.

4.1.1."стандарт" гэж тодорхой хүрээнд хэм хэмжээ бий болгоход чиглэсэн ерөнхий үзүүлэлтийг сонирхогч талууд зөвшилцөн боловсруулж, эрх бүхий байгууллагаас баталсан баримт бичгийг;

4.1.2.“стандартчилал” гэж бүтээгдэхүүн, үйлчилгээний харилцан орлуулалт, мэдээлэл, техник, хэмжилт, сорилтын нэгдмэл, нийцтэй, аюулгүй байдлыг хангах зорилгоор нийтээр дагаж мөрдүүлэх хэм хэмжээ, дахин давтан хэрэглэх журам тогтоох үйл ажиллагааг;

4.1.3.“техникийн зохицуулалт” гэж бүтээгдэхүүний тодорхойлолт, түүнтэй холбоотой боловсруулалт болон үйлдвэрлэлийн аргууд, түүний дотор заавал биелүүлэх шаардлагатай захиргааны заалтуудыг тогтоосон баримт бичгийг;

4.1.4.“тохирлын үнэлгээ” гэж бүтээгдэхүүн, үйл явц, ажилтны ур чадвар, менежментийн тогтолцоо нь стандарт, техникийн зохицуулалт, тогтоосон шаардлагыг хангаж байгаа эсэхийг тогтоох үйл ажиллагааг;

4.1.5."тохирлын үнэлгээний байгууллага" гэж энэ зүйлийн 4.1.4-т заасан үйл ажиллагааг эрхлэх эрх бүхий байгууллагыг;

4.1.6.“тохирлын гэрчилгээ” гэж бүтээгдэхүүн нь стандарт, техникийн зохицуулалт, тогтоосон шаардлагад нийцэж байгааг тодорхойлсон баримт бичгийг;

4.1.7.“тохирлын үнэлгээний итгэмжлэл” гэж эрх бүхий байгууллагаас тохирлын үнэлгээний үйл ажиллагааг гүйцэтгэх мэргэжлийн чадавхтайг тогтоох ажиллагааг;

4.1.8.“тохирлын тэмдэг” гэж бүтээгдэхүүн нь стандарт, тогтоосон шаардлагыг хангаж байгааг тодорхойлсон тэмдэглэгээг;

4.1.9.“аюулгүйн тэмдэг” гэж бүтээгдэхүүн нь техникийн зохицуулалтаар тогтоосон шаардлагыг хангаж байгааг тодорхойлсон тэмдэглэгээг;

4.1.10.“нийлүүлэгчийн мэдэгдэл” гэж бүтээгдэхүүн, үйлчилгээ нь стандарт, техникийн зохицуулалт, тогтоосон шаардлагад нийцэж байгааг үйлдвэрлэгч, нийлүүлэгчээс бичгээр гаргасан нотолгоог;

4.1.11.“бүтээгдэхүүн” гэж үйлдвэрлэл, үйлчилгээний үйл явцад бий болсон үр дүнг;

4.1.12.“стандартчиллын техникийн хороо” гэж стандартчиллын тодорхой чиглэлээр үндэсний, олон улс болон бүс нутгийн стандартыг боловсруулах, хөгжүүлэх, хянан магадлах үүрэг бүхий ажлын хэсгийг.

4.1.13.“үндэсний стандартын суурь стандарт” гэж стандартчиллын үйл ажиллагаанд баримтлах техник ажлын журам болон стандартын бүтэц, бичвэр, боловсруулах дүрмийг тогтоосон үндэсний стандартыг;

4.2.Энэ зүйлийн 4.1-д зааснаас бусад нэр томъёог Монгол Улсын хууль, олон улсын стандартчиллын байгууллагаас баталсан стандарт, удирдамж, Дэлхийн худалдааны байгууллагын хэлэлцээрт заасны дагуу ойлгож хэрэглэнэ.

ХОЁРДУГААР БҮЛЭГ

СТАНДАРТЧИЛАЛ

5 дугаар зүйл.Стандартчиллын зорилго, баримт бичиг

5.1 Стандартчиллын зорилго нь бүтээгдэхүүн, бүтээгдэхүүний хэрэглээний нийцтэй байдал болон сорилт, хэмжилтийн нэгдмэл байдлыг хангах замаар нөөцийг зүй зохистой ашиглах, бүтээгдэхүүний өрсөлдөх чадварыг дээшлүүлэх, худалдааг нэмэгдүүлэх үйл ажиллагаанд дэмжлэг үзүүлэхэд оршино.

5.2.Стандартчиллын баримт бичигт дараах баримт бичиг хамаарна.

5.2.1.Монгол Улсын үндэсний стандарт /цаашид “үндэсний стандарт” гэх/;
5.2.2.байгууллагын стандарт;

5.2.3.олон улс, бүс нутгийн стандарт, удирдамж, зөвлөмж, гадаад улсын стандарт.

5.3.Стандартчиллын баримт бичиг зохиогчийн эрхэд хамаарахгүй.

6 дугаар зүйл. Үндэсний стандарт

6.1.Үндэсний стандартын төслийг сонирхогч талууд санаачлан боловсруулна.

6.2.Үндэсний стандарт нь товчилсон тэмдэглэгээ, улсын бүртгэлийн дугаартай байх бөгөөд түүнийг баталсан шийдвэрт өөрөөр заагаагүй бол стандартчиллын баримт бичгийн мэдээллийн санд бүртгэсэн өдрөөс эхлэн хүчин төгөлдөр болно.

7 дугаар зүйл. Байгууллагын стандарт

7.1.Хуулийн этгээд байгууллагын стандартыг боловсруулж батлан, үйл ажиллагаандаа хэрэглэж болно.

7.2.Байгууллагын стандарт нь үндэсний стандарт боловсруулах шаардлагад нийцсэн байна.

7.3.Байгууллагын стандартыг Стандартчилал, тохирлын үнэлгээний төрийн захиргааны байгууллага, түүний харьяа аймаг, нийслэл дэх байгууллагад бүртгүүлнэ.

7.4.Хуулийн этгээд байгууллагын стандартыг бүртгүүлэн хэрэглэх хугацаанд үндэсний стандарт шинээр болон шинэчлэн батлагдсан тохиолдолд үндэсний стандартад нийцүүлнэ.

8 дугаар зүйл. Олон улс, бүс нутгийн стандарт, гадаад улсын стандарт

8.1.Иргэн, хуулийн этгээд нь олон улс, бүс нутгийн стандарт, удирдамж, зөвлөмж, гадаад улсын стандартыг хэрэглэх тохиолдолд стандартчилал, тохирлын үнэлгээний төрийн захиргааны байгууллагад бүртгүүлнэ.

8.2.Хүчин төгөлдөр бус эсхүл үндэсний стандартаар тогтоосон шаардлагыг бууруулсан стандартыг хүн, хуулийн этгээд хэрэглэхгүй бөгөөд энэ хуулийн 8.1 дэх заалтын дагуу холбогдох стандартыг бүртгүүлэн хэрэглэнэ.

9 дүгээр зүйл.Стандартчиллын техникийн хороо

9.1.Стандартчилал, тохирлын үнэлгээний төрийн захиргааны байгууллагын дэргэд салбарын харьяаллаар үндэсний болон олон улс, бүс нутгийн, стандартын төслийг хэлэлцэх, санал, дүгнэлт гаргах үүрэг бүхий орон тооны бус Стандартчиллын техникийн хороо /цаашид “Техникийн хороо” гэх/ ажиллана.

9.2.Техникийн хороо нь төрийн байгууллага, тухайн салбарын мэргэжлийн холбоо, хуулийн этгээд, шинжлэх ухааны байгууллагын төлөөлөл болон сонирхогч талуудын төлөөлөл бүхий саналын эрхтэй 21 хүртэлх гишүүний бүрэлдэхүүнтэй байна.

9.3.Техникийн хороо дараах эрх, үүрэгтэй:

9.3.1.үндэсний стандарт болон олон улс, бүс нутгийн стандартын төслийг хэлэлцэх, санал өгөх;-

9.3.2.энэ хуульд заасан байгууллагын стандартаас бусад стандартчиллын баримт бичгийн төсөлд сонирхогч талуудын санал авах, зөвшилцөх;

9.3.3.үндэсний стандартын төсөл хэлэлцэх, дүгнэлт гаргах;

9.3.4.шаардлагатай гэж үзвэл тодорхой чиглэлээр техникийн дэд хороог байгуулан ажиллуулах;

9.3.5.стандартад дүн шинжилгээ, үнэлгээ хийх, авч хэрэгжүүлэх арга хэмжээний талаар санал, дүгнэлт гаргах;

9.3.6.олон улс, бүс нутгийн стандартчиллын байгууллага болон техникийн хороодтой хамтран ажиллах, мэдээлэл солилцох;

9.4.Техникийн хороо, дэд хорооны гишүүд нь ашиг сонирхлоос ангид байна.

10 дугаар зүйл. Стандартыг хэрэглэх, мөрдөх

10.1.Иргэн, хуулийн этгээд хэрэглэх стандартыг сонгоно.

10.2.Иргэн, хуулийн этгээд сонгосон стандартын үзүүлэлт шаардлагыг хангана.

10.3.Хууль тогтоомж, техникийн зохицуулалт, олон улсын гэрээнд эш татсан стандарт нь тухайн баримт бичгийн нэгэн адил хүчинтэй байна.

10.4.Хүн, хуулийн этгээдийн хооронд байгуулсан гэрээнд талууд стандартыг бүхлээр нь, эсхүл хэсэгчлэн эш татаж хэрэглэхээр тохирсон бол гэрээний заалтыг дагаж мөрдөнө.

10.5.Гадаадын хөрөнгө оруулалттай, нэг удаагийн шинжтэй томоохон бүтээн байгуулалтад хөрөнгө оруулагч талын стандартыг талууд харилцан тохиролцож гэрээний нөхцөл болон холбогдох хууль тогтоомжийн дагуу хэрэглэж болно.

10.6.Гадаадын хөрөнгө оруулалттай томоохон бүтээн байгуулалтад хэрэглэсэн, цаашид дахин ашиглах боломжтой гадаад улсын болон олон улсын стандартыг монгол хэл дээр орчуулж, нотариатаар гэрчлүүлэн стандартчилал, тохирлын үнэлгээний асуудал эрхэлсэн төрийн захиргааны байгууллагад бүртгүүлснээр шууд хэрэглэж болно.

10.7.Энэ зүйлийн 10.5-т заасан гадаад улсын стандарт нь үндэсний стандартаар тогтоосон шаардлагыг бууруулсан бол тухайн стандартыг хэрэглэхгүй.

ГУРАВДУГААР БҮЛЭГ

ТЕХНИКИЙН ЗОХИЦУУЛАЛТ

11 дүгээр зүйл. Техникийн зохицуулалт

11.1. Хүн, малын эрүүл мэнд, хүрээлэн байгаа орчин, бүтээгдэхүүн, үйлдвэрлэлийн аюулгүй байдлыг хангах, нийтийн ашиг сонирхлыг хамгаалах зорилгоор техникийн зохицуулалтыг нийтээр заавал дагаж мөрдөнө.

11.2. Техникийн зохицуулалтыг эрх бүхий байгууллага боловсруулж, энэ зүйлийн 11.3-т заасан дүгнэлтийг үндэслэн Засгийн газар батална.

11.3. Техникийн зохицуулалт боловсруулах аргачлалыг стандартаар тогтоож аргачлалын дагуу боловсруулсан эсэхийг стандартчилал, тохирлын үнэлгээний төрийн захиргааны байгууллага хянаж, дүгнэлт гаргана.

11.4. Техникийн зохицуулалтын хэрэгжилтийг улсын хэмжээнд Засгийн газар болон Төрийн хяналт шалгалтын тухай хуульд заасан эрх бүхий байгууллага хангуулна.

11.5. Монгол Улсаас гадаад худалдаанд хэрэглэх техникийн зохицуулалтыг батлагдахаас 60-аас доошгүй хоногийн өмнө стандартчилал, тохирлын үнэлгээний төрийн захиргааны байгууллага нь Дэлхийн худалдааны байгууллагын гишүүн орнуудад мэдээлнэ.

11.6. Дэлхийн худалдааны байгууллагын гишүүн орнуудаас санал болгож байгаа гадаад худалдаанд хэрэглэх техникийн зохицуулалтыг хүлээн зөвшөөрөх эсэх асуудлыг гадаад харилцааны асуудал эрхэлсэн төрийн захиргааны төв байгууллагын саналыг үндэслэн Засгийн газар шийдвэрлэнэ.

11.7. Зөвшөөрөл эзэмшигч энэ хуульд заасан стандарт, техникийн зохицуулалтыг зөрчсөн тохиолдолд Зөвшөөрлийн тухай хуульд заасны дагуу зөвшөөрлийг түдгэлзүүлэх, хүчингүй болгох үндэслэл болно.

ДӨРӨВДҮГЭЭР БҮЛЭГ ТОХИРЛЫН ҮНЭЛГЭЭ

12 дугаар зүйл. Тохирлын үнэлгээний зорилго, хамрах хүрээ

12.1. Тохирлын үнэлгээ нь бүтээгдэхүүний аюулгүй байдлыг хангах, өрсөлдөх чадварыг нэмэгдүүлэх, хэрэглэгчийн эрх ашгийг хамгаалахад чиглэнэ.

12.2. Хүн, малын эрүүл мэнд, хүрээлэн байгаа орчин, нийтийн ашиг сонирхолд хохирол учруулж болзошгүй бүтээгдэхүүнийг тохирлын үнэлгээнд заавал хамруулна.

12.3. Тохирлын үнэлгээнд заавал хамруулах бүтээгдэхүүний жагсаалтыг стандартчилал, тохирлын үнэлгээний төрийн захиргааны байгууллагын саналыг үндэслэн Засгийн газар батална.

12.4.Тохирлын үнэлгээнд заавал хамруулахаас бусад бүтээгдэхүүнийг үйлдвэрлэгч, нийлүүлэгч, хэрэглэгчийн хүсэлтээр хамруулна.

13 дугаар зүйл.Тохирлын баталгаа

13.1.Тохирлын баталгаа нь тохирлын гэрчилгээ болон нийлүүлэгчийн мэдэгдэл гэсэн хэлбэртэй байна.

13.2.Нийлүүлэгчийн мэдэгдэлд тавих шаардлагыг стандартаар тогтоож, мэдэгдлийг стандартчилал, тохирлын үнэлгээний төрийн захиргааны байгууллагад бүртгүүлнэ.

13.3.Аюулгүйн тэмдэг, тэдгээрийн хэрэглээнд тавих шаардлагыг стандартаар тогтооно.

13.4.Монгол Улсаас олон улс, бүс нутгийн байгууллага, худалдааны түнш орнуудтай байгуулсан гэрээ, хэлэлцээрээр тохирсон тохирлын болон түүнтэй адилтгах тэмдэг, гэрчилгээг хүлээн зөвшөөрнө.

13.5.Тохирлын гэрчилгээ нь Монгол Улсын олон улсын гэрээгээр тохирсон улс орнуудад хүчин төгөлдөр байна.

13.6.Тохирлын тэмдэг болон аюулгүйн тэмдгийг итгэмжлэгдсэн баталгаажуулалтын байгууллага олгоно.

14 дүгээр зүйл.Тохирлын үнэлгээний байгууллагын эрх, үүрэг

14.1.Тохирлын үнэлгээний байгууллага нь Монгол Улсын хуулийн этгээд байх бөгөөд холбогдох хууль тогтоомж, стандартын дагуу үйл ажиллагаа явуулна.

14.2.Тохирлын үнэлгээний байгууллага нь итгэмжлэлд хамрагдаж болно.

14.3.Хүн, малын эрүүл мэнд, хүрээлэн байгаа орчин, нийтийн ашиг сонирхолд хохирол учруулж болзошгүй бүтээгдэхүүнд итгэмжлэгдсэн тохирлын үнэлгээний байгууллага тохирлын үнэлгээ хийнэ.

14.4.Гадаад улсын итгэмжлэлийн байгууллагаас итгэмжлэгдсэн болон гадаад улсын тохирлын үнэлгээний байгууллага нь Монгол Улсын нутаг дэвсгэрт тохирлын үнэлгээний үйл ажиллагаа эрхлэх бол энэ хуульд заасан тохирлын үнэлгээний итгэмжлэлийн байгууллагад бүртгүүлнэ.

14.5.Энэ зүйлийн 14.4-д заасны дагуу бүртгүүлээгүй гадаад улсын тохирлын үнэлгээний байгууллагын үр дүнг хүлээн зөвшөөрөхгүй.

14.6.Тохирлын үнэлгээний байгууллага дараах эрх, үүрэгтэй:

14.6.1.тохирлын үнэлгээний үр дүнг гаргах;

14.6.2.тохирлын үнэлгээг итгэмжлэлээр тогтоосон хүрээнд явуулах;

14.6.3.итгэмжлэлийн шалгуурыг тогтвортой хангах;

14.6.4.тохирлын үнэлгээнд мэргэжлийн хүнийг татан оролцуулах;

15 дугаар зүйл. Баталгаажуулалтын байгууллага

15.1.Баталгаажуулалтын байгууллага нь бүтээгдэхүүний, менежментийн тогтолцооны, ажилтны гэсэн төрөлтэй байна.

15.2.Баталгаажуулалтын байгууллага нь тохирлын үнэлгээг схемийн дагуу гүйцэтгэнэ.

15.3. Энэ хуулийн 15.2-т заасан схем гэж тохирлын үнэлгээний объект нь техникийн зохицуулалт, стандартаар тогтоосон шаардлагад нийцэж байгааг тодорхойлоход ашиглах дүрэм, журам, аргачлал болон үйл явцын (сорьц авах, шинжилгээ, магадлан шалгалт, үйлдвэрлэлийн болон удирдлагын тогтолцооны үнэлгээ зэрэг) багцыг хэлнэ.

15.4.Итгэмжлэгдсэн баталгаажуулалтын байгууллага олон улсын стандартчиллын холбогдох баримт бичигт заасан шаардлагыг хангасан этгээдийг шинжээчээр томилно.

15.5.Баталгаажуулалтын байгууллагын шинжээчид эрх олгоход тавигдах нийтлэг шаардлагыг стандартаар тогтооно.

15.6.Баталгаажуулалтын үйл ажиллагааг итгэмжлэгдсэн баталгаажуулалтын байгууллагаас стандартчилал, тохирлын үнэлгээний төрийн захиргааны байгууллагаас эрх авсан баталгаажуулалтын шинжээч гүйцэтгэнэ.

15.7.Баталгаажуулалтын байгууллага нь итгэмжлэгдсэн лаборатори, техникийн хяналтын байгууллагын үр дүнг ашиглана.

15.8.Тохирлын үнэлгээний байгууллагын тохирлын үнэлгээний үр дүнгээр тохирлын гэрчилгээг хүчингүй болгосон тохиолдолд энэ тухай Зөвшөөрлийн тухай хуульд заасны дагуу зөвшөөрөл олгосон эрх бүхий байгууллага, албан тушаалтанд бичгээр мэдэгдэнэ.

16 дугаар зүйл. Лаборатори

16.1.Лабораторийг үйл ажиллагааны хүрээ, чиг үүрэг, чадамжаар нь дараах шатлалаар ангилна.

16.1.1.Лаборатори;

16.1.2.Хяналтын лаборатори;

16.1.3.Лавлагаа лаборатори.

16.2.Лавлагаа лаборатори нь зохион байгуулалтын хувьд бие даасан хараат бусаар үйл ажиллагаа явуулна.

16.3.Лабораторийн нэгдсэн бодлого, төлөвлөлт, төрийн зохицуулалтыг хэрэгжүүлэхтэй холбогдсон журмыг лабораторийн үйл ажиллагааны нэгдсэн бодлого, төлөвлөлт хариуцсан Засгийн газрын гишүүний саналыг үндэслэн Засгийн газар батална.

16.4.Лавлагаа лаборатори нь шинжилгээний мэдээллийн нэгдсэн санг бүрдүүлж, дүн шинжилгээ хийж, төрийн бодлого, шийдвэр гаргахад дэмжлэг үзүүлнэ.

16.5.Лабораторийн үйл ажиллагаа дараах төрөлтэй байна.

16.6.1.Хүнсний, аюулгүй байдлын;

16.6.2.Хүрээлэн буй орчны;

16.6.3.Эм, эмнэлгийн хэрэгслийн;

16.6.4.Барилга, барилгын материал;

16.6.5.Ашигт малтмал;

16.6.6.хуульд заасан бусад.

16.6.Лабораторийн үйл ажиллагааны нэгдсэн бодлого, төлөвлөлтийг зохион байгуулах, салбар хоорондын уялдаа холбоог хангах зорилгоор лабораторийн үйл ажиллагааны нэгдсэн бодлого, төлөвлөлтийн асуудал хариуцсан Засгийн газрын гишүүний дэргэд лабораторийн бодлого, зохицуулалтын орон тооны бус зөвлөл ажиллана.

16.7.Лабораторийн бодлогын зөвлөл нь дараах чиг үүргийг хэрэгжүүлнэ. Үүнд:

16.7.1.лабораторийн шинжилгээний техник, тоног төхөөрөмж, урвалж бодис, программ хангамжийг уялдуулан зохицуулах;

16.7.2.лабораторийг чадавхжуулах зорилгоор хүний нөөцийн менежмент, сургалтыг эрх бүхий байгууллагатай зөвшилцөн зохион байгуулах.

16.7.3.лабораторийн чадавхыг бэхжүүлэх чиглэлээр хэрэгжүүлж байгаа хөтөлбөр, төсөл, арга хэмжээний тухай мэдээллийг судлан боловсруулж, тэдгээрийн давхардал, хийдлийг арилгах, үр нөлөөг дээшлүүлэх.

16.8.Лабораторийн бодлогын зөвлөлийн бүрэлдэхүүн, ажиллах журмыг лабораторийн үйл ажиллагааны нэгдсэн бодлого, төлөвлөлт хариуцсан Засгийн газрын гишүүн батална.

16.9.Лабораторийн нэгдсэн бодлого, төлөвлөлт, төрийн зохицуулалтыг хэрэгжүүлэхтэй холбогдсон журмыг лабораторийн үйл ажиллагааны нэгдсэн бодлого, төлөвлөлт хариуцсан Засгийн газрын гишүүний саналыг үндэслэн Засгийн газар батална.

16.10.Лабораторийн албан хаагчийн мэргэжлийн түвшинг тогтоох шалгалт авах, мэргэжлийн зэрэг олгох журмыг лабораторийн нэгдсэн бодлого, төлөвлөлтийн асуудал эрхэлсэн Засгийн газрын гишүүн батална.

17 дугаар зүйл.Техникийн хяналтын байгууллага

17.1.Техникийн хяналт нь үйлдвэрлэгчийн, импортлогчийн, хөндлөнгийн гэсэн төрөлтэй байна.

17.2.Техникийн хяналтын байгууллага нь бүтээгдэхүүн, түүний зохион бүтээлт, үйлдвэрлэл, ажил үйлчилгээ, ажлын байрны орчин нөхцөл, хэвийн ажиллагаа, аюулгүй байдлын үзүүлэлт нь стандартаар тогтоосон шаардлагад нийцэж байгаа эсэхэд дүгнэлт гаргана.

ТАВДУГААР БҮЛЭГ

ТОХИРЛЫН ҮНЭЛГЭЭНИЙ ИТГЭМЖЛЭЛ

18 дугаар зүйл.Тохирлын үнэлгээний итгэмжлэлийн зорилго, тогтолцоо

18.1.Үндэсний итгэмжлэлийн байгууллага нь тохирлын үнэлгээний итгэмжлэлийн талаарх төрийн бодлого, хууль тогтоомж, олон улсын гэрээ, хэлэлцээрийн хэрэгжилтийг хангах, итгэмжлэлийн ажил, үйлчилгээний үнэ тариф тогтоох, тохирлын үнэлгээний байгууллагыг итгэмжлэх, итгэмжлэлийг түдгэлзүүлэх, сэргээх, хүчингүй болгох, итгэмжлэлийн дараах хяналт хэрэгжүүлэх, итгэмжлэлийн шинжээчийг сонгон шалгаруулах, сургах, эрх олгох, итгэмжлэлийн бүртгэл, мэдээллийн сан хөтлөх, итгэмжлэлийн үр дүнг үндэсний болон олон улсын хэмжээнд харилцан хүлээн зөвшөөрүүлэх нөхцөлийг бүрдүүлэх чиг үүргийг хэрэгжүүлнэ.

18.2.Үндэсний итгэмжлэлийн байгууллагыг орон тооны гурав, орон тооны бус хоёр, нийт таван гишүүний бүрэлдэхүүнтэй зөвлөл удирдана.

18.2.1.Үндэсний итгэмжлэлийн байгууллагын даргыг Төрийн албаны тухай хуульд заасан журмын дагуу сонгон шалгаруулж, итгэмжлэлийн асуудал эрхэлсэн Засгийн газрын гишүүн гурван жилийн хугацаагаар томилж, чөлөөлнө.

18.2.2.Үндэсний итгэмжлэлийн байгууллагын орон тооны хоёр гишүүнийг итгэмжлэл, стандартчилал, тохирлын үнэлгээ, чанарын дэд бүтэц, техникийн зохицуулалт, эрх зүй, эдийн засаг, эсхүл холбогдох мэргэжлийн чиглэлээр зохих мэдлэг, туршлагатай этгээдээс хуульд заасан журмын дагуу сонгон шалгаруулж, итгэмжлэлийн асуудал эрхэлсэн Засгийн газрын гишүүн гурван жилийн хугацаагаар томилно.

18.2.3.Үндэсний итгэмжлэлийн байгууллагын орон тооны бус хоёр гишүүний нэгийг худалдаа, аж үйлдвэрийн танхимын, нөгөөг хэрэглэгчийн эрхийг хамгаалах чиглэлээр үйл ажиллагаа явуулдаг байгууллагын санал болгосон нэр дэвшигчээс итгэмжлэлийн асуудал эрхэлсэн Засгийн газрын гишүүн гурван жилийн хугацаагаар томилно.

18.2.4.Энэ хуулийн 18.3, 18.4, 18.5-д заасан гишүүнийг нэг удаа улируулан томилж болно.

18.2.5.Үндэсний итгэмжлэлийн байгууллагын дарга, гишүүн нь итгэмжлэлд хамрагдахаар хүсэлт гаргасан тохирлын үнэлгээний байгууллага, итгэмжлэгдсэн тохирлын үнэлгээний байгууллага, эсхүл тэдгээртэй хамаарал бүхий этгээдтэй ашиг сонирхлын зөрчилгүй байна.

18.3.Үндэсний итгэмжлэлийн байгууллага нь итгэмжлэлийн ажил, үйлчилгээний хураамж, сургалт, лавлагаа, бүртгэл, мэдээллийн үйлчилгээний төлбөр, олон улсын байгууллага, хандивлагч орны хандив, тусламж болон хуульд заасан бусад өөрийн орлогоор санхүүжинэ.

18.4.Үндэсний итгэмжлэлийн байгууллагын дүрмийг Засгийн Газар батална.

19 дугаар зүйл. Тохирлын үнэлгээний итгэмжлэлийн байгууллага

19.1. Итгэмжлэлийн байгууллага итгэмжлэлийн бодлогыг хэрэгжүүлэх бөгөөд дараах бүрэн эрхтэй:

19.1.1.тохирлын үнэлгээний итгэмжлэлийн байгууллагын чадавхыг тогтоох, итгэмжлэл олгох, түдгэлзүүлэх, хүчингүй болгох;

19.1.2.итгэмжлэлийн шинжээчид тавих шаардлагыг тогтоох, шинжээч сонгон шалгаруулах, шинжээчийн эрх олгох, цуцлах;

19.1.3.итгэмжлэлийн лавлагаа, мэдээллийн улсын нэгдсэн санг бүрдүүлэх, хөтлөх;

19.1.4.холбогдох дүрэм, журам, заавар батлах, хэрэгжилтэд хяналт тавих;

19.1.5. мэргэжил, арга зүйн туслалцаа үзүүлэх, сургалт явуулах;

19.1.6.олон улс, бүс нутгийн байгууллага, гадаад улстай итгэмжлэлийн үр дүнг харилцан хүлээн зөвшөөрөх, хэлэлцээрт нэгдэх, олон улсын байгууллагад гишүүнээр элсэх санал гаргах;

19.1.7.олон улс, бүс нутаг, гадаад улсын итгэмжлэлийн байгууллагатай хамтын ажиллагааг хөгжүүлэх.

19.1.8.Итгэмжлэлийн байгууллагыг гадаад, дотоодод байгууллагын дарга төлөөлнө.

19.1.9. хуульд заасан бусад бүрэн эрх.

20 дугаар зүйл.Тохирлын үнэлгээний итгэмжлэлийн техникийн хороо

20.1.Техникийн хороо нь итгэмжлэлийн шалгуур тогтоох, тохирлын үнэлгээний байгууллагын итгэмжлэлийн шаардлага, шалгуурыг хангасан эсэх талаар дүгнэлт гаргах, техникийн зөвлөгөө өгөх чиг үүрэгтэй байна.

20.2.Техникийн хороо нь орон тооны бус байх бөгөөд сонирхогч талуудын оролцоог тэгш хангасан байна.

21 дүгээр зүйл. Маргаан шийдвэрлэх комисс

21.1. Тохирлын үнэлгээний байгууллагаас итгэмжлэлийн талаар гаргасан маргааныг Маргаан шийдвэрлэх комисс (цаашид " комисс " гэх) шийдвэрлэнэ.

21.2. Зөвлөл нь итгэмжлэлийн шийдвэртэй холбоотой маргаан үүссэн тохиолдол бүрд сонирхлын зөрчлөөс ангид, мэргэшсэн шинжээчдээс бүрдсэн Комиссыг байгуулж, ажиллуулна.

21.3.Комиссын ажиллах журмыг Итгэмжлэлийн зөвлөл батална.

22 дугаар зүйл.Итгэмжлэлийн шинжээч

22.1. Итгэмжлэлийн шинжээч нь тохирлын үнэлгээний байгууллагын чадавхыг стандарт, техникийн зохицуулалтын шаардлагад нийцэж байгаа эсэхийг үнэлнэ.

22.2. Шинжээч нь дараах шаардлагыг хангасан байна:

22.2.1. итгэмжлэлийн байгууллагаас олгосон эрх бүхий байх,

22.2.2. мэргэжлийн ур чадвар, туршлагатай байх,

22.2.3. ашиг сонирхлын зөрчилгүй байх.

22.3. Шинжээчийн чадавхыг тогтмол үнэлж, сургалт, дахин баталгаажуулалтад хамруулна.

22.4. Шинжээчийн тайлан нь итгэмжлэлийн шийдвэр гаргах үндсэн нотолгоо болно.

ЗУРГАДУГААР БҮЛЭГ
СТАНДАРТЧИЛАЛ, ТЕХНИКИЙН ЗОХИЦУУЛАЛТ, ТОХИРЛЫН ҮНЭЛГЭЭ,
ТОХИРЛЫН ҮНЭЛГЭЭНИЙ ИТГЭМЖЛЭЛИЙН ТОГТОЛЦОО, УДИРДЛАГА

23 дугаар зүйл.Стандартчилал, техникийн зохицуулалт, тохирлын үнэлгээ, тохирлын үнэлгээний итгэмжлэлийн талаарх Засгийн газрын бүрэн эрх

23.1.Засгийн газар стандартчилал, техникийн зохицуулалт, тохирлын үнэлгээ, тохирлын үнэлгээний итгэмжлэлийн талаар дараах бүрэн эрхийг хэрэгжүүлнэ:

23.1.1.стандартчилал, техникийн зохицуулалт, тохирлын үнэлгээ, тохирлын үнэлгээний итгэмжлэлийн талаарх бодлогыг хэрэгжүүлэхэд дэмжлэг үзүүлэх;

23.1.2.стандартчилал, техникийн зохицуулалт, тохирлын үнэлгээ, тохирлын үнэлгээний итгэмжлэлийн тогтолцооны үр нөлөөг сайжруулах, энэ чиглэлээр хэрэгжүүлэх үйл ажиллагааг боловсронгуй болгох, хууль тогтоомжийн төсөл боловсруулах;

23.1.3.энэ хуулийн 11 дүгээр зүйлийн 11.2-т заасны дагуу техникийн зохицуулалтыг батлах;

23.1.4.энэ хуулийн 14 дүгээр зүйлийн 14.3-т заасан хүн, малын эрүүл мэнд, хүрээлэн байгаа орчин, нийтийн ашиг сонирхолд хохирол учруулж болзошгүй бүтээгдэхүүний жагсаалтыг батлах, хэрэгжилтийг хангуулах;

23.1.5.Энэ хуулийн 32 дугаар зүйлд заасан мэдээллийн санг бүрдүүлэх, ашиглах журмыг батлах.

24 дүгээр зүйл.Стандартчилал, техникийн зохицуулалт, тохирлын үнэлгээ, тохирлын үнэлгээний итгэмжлэлийн асуудал эрхэлсэн Засгийн газрын гишүүний бүрэн эрх

24.1.Стандартчилал, техникийн зохицуулалт, тохирлын үнэлгээний итгэмжлэлийн асуудал эрхэлсэн Засгийн газрын гишүүн нь дараах бүрэн эрхийг хэрэгжүүлнэ:

24.1.1.салбарын хөгжлийн бодлого, чиглэлийг тодорхойлж, стратегийн төлөвлөгөөг хэрэгжүүлэхэд дэмжлэг үзүүлэх, нэгдсэн удирдлагаар хангах;

24.1.2.стандартчилал, техникийн зохицуулалт, тохирлын үнэлгээ, тохирлын үнэлгээний итгэмжлэлийн талаарх бодлогын хэрэгжилтийг нэгдсэн удирдлагаар хангах;

24.1.3.стандартчилал, техникийн зохицуулалт, тохирлын үнэлгээ, тохирлын үнэлгээний итгэмжлэлийн тогтолцоог бэхжүүлэх саналыг Засгийн газарт танилцуулж, шийдвэрлүүлэх;

24.1.4.чанартай бүтээгдэхүүн, үйлчилгээний тэргүүн туршлагыг түгээн дэлгэрүүлэх, олон нийтэд сурталчлан таниулах, алдаршуулах зорилгоор үндэсний чанарын шагнал олгох;

24.1.5.энэ хуульд заасан төлбөртэй ажил, үйлчилгээний төлбөрийн жишиг хэмжээг чөлөөт зах зээлийн үнэ тарифтай уялдуулан тогтоох;

24.1.6.стандартчилал, тохирлын үнэлгээний төрийн захиргааны байгууллагын даргыг томилж, чөлөөлөх саналыг Засгийн газарт оруулах;

24.1.7.Стандартчиллын ажлын төлөвлөгөө, биелэлт, шинжлэх ухаан, техникийн түвшний үзлэг үр дүн, стандарт, техникийн зохицуулалтын хэрэгжилтийн чиглэлээр Засгийн газрын гишүүдэд танилцуулж, хэрэгжилтийг хангуулах.

25 дугаар зүйл. Стандартчилал, техникийн зохицуулалт, тохирлын үнэлгээний талаар төрийн захиргааны төв байгууллагын чиг үүрэг

25.1.Төрийн захиргааны төв байгууллага нь эрхэлсэн асуудлын хүрээнд стандартчилал, техникийн зохицуулалт, тохирлын үнэлгээний талаар дараах чиг үүргийг хэрэгжүүлнэ:

25.1.1.салбарын хэмжээнд мөрдөгдөж байгаа стандарт, тохирлын үнэлгээ, техникийн зохицуулалтын хэрэгжилтэд дүн шинжилгээ хийх, хяналт шалгалт явуулах;

25.1.2.стандартыг шинэчлэн сайжруулах, хэрэгжүүлэх ажлыг стандартчилал, тохирлын үнэлгээний төрийн захиргааны байгууллагатай хамтран зохион байгуулах;

25.1.3.эрхэлсэн асуудлаар энэ хуульд заасан Техникийн хороонд гишүүнийг ажиллуулах;

25.1.4.салбарын хэмжээнд хүчинтөгөлдөр мөрдөх стандартчилал, тохирлын үнэлгээний талаар нийтэд мэдээлэх, сурталчлах, соён гэгээрүүлэх үйл ажиллагааг зохион байгуулах.

25.2.Гадаад худалдааны асуудал эрхэлсэн төрийн захиргааны төв байгууллага энэ хуулийн 11 дүгээр зүйлийн 11.3, 12 дугаар зүйлийн 12.3-т заасан баримт бичгийг Монгол Улсын нэрийн өмнөөс Дэлхийн худалдааны байгууллагад мэдэгдэнэ.

26 дугаар зүйл.Стандартчилал, тохирлын үнэлгээний төрийн захиргааны байгууллагын тогтолцоо

26.1.Стандартчилал, тохирлын үнэлгээний байгууллагын тогтолцоо нь стандартчилал, тохирлын үнэлгээний төрийн захиргааны байгууллага, түүний харьяа аймаг, нийслэл дэх байгууллагаас бүрдэнэ.

26.2.Стандартчилал, тохирлын үнэлгээний төрийн захиргааны байгууллага нь стандартчилал, техникийн зохицуулалт, тохирлын үнэлгээний чиглэлээр мэргэжил арга зүйн удирдлагаар хангах чиг үүрэг бүхий төрийн захиргааны байгууллага мөн.

26.3.Аймаг, нийслэл дэх стандартчилал, тохирлын үнэлгээний төрийн захиргааны байгууллага нь нутаг дэвсгэрийн хэмжээнд стандартчилал, техникийн зохицуулалт, тохирлын үнэлгээний бодлогын хэрэгжилтийг хангуулах, мэргэжил, арга зүйн дэмжлэг үзүүлэх чиг үүргийг хэрэгжүүлнэ.

26.4.Салбарын хяналтыг хэрэгжүүлэх эрх бүхий байгууллага, хяналтын улсын байцаагч, албан тушаалтан нь хариуцсан чиглэлээр стандартчилал, тохирлын үнэлгээний хэрэгжилтийг хангуулж ажиллана.

26.5.Аймаг, нийслэлийн Засаг дарга харьяа нутаг дэвсгэртээ энэ хуулийн биелэлтийг хангаж, стандартчилал, тохирлын үнэлгээний байгууллагын үйл ажиллагаанд дэмжлэг үзүүлнэ.

26.6.Стандартчиллын ажлын төлөвлөгөө, биелэлт, шинжлэх ухаан, техникийн түвшний үзлэгийн үр дүн болон стандарт, техникийн зохицуулалтын хэрэгжилтийн үр дүнд хийсэн дүгнэлтийг Стандартчилал, техникийн зохицуулалт, тохирлын үнэлгээний итгэмжлэлийн асуудал эрхэлсэн Засгийн газрын гишүүнд танилцуулна.

27 дугаар зүйл.Стандартчилал, тохирлын үнэлгээний төрийн захиргааны байгууллага

27.1.Стандартчилал, тохирлын үнэлгээний төрийн захиргааны байгууллага дараах чиг үүргийг хэрэгжүүлнэ:

27.1.1.эрхэлсэн асуудлын хүрээнд бодлого боловсруулах, хэрэгжүүлэх, мэргэжил, арга зүйн удирдлагаар хангах чиг үүргийг хэрэгжүүлэх;

27.1.2.стандартчилал, техникийн зохицуулалт, тохирлын үнэлгээний үйл ажиллагаанд баримтлах баримт бичиг, хөтөлбөр, төлөвлөгөө, нийтээр дагаж мөрдөх хэм хэмжээ тогтоосон акт боловсруулах, батлах, хэрэгжүүлэх;

27.1.3.стандартчиллын техникийн хороо байгуулах, өөрчлөх, үйл ажиллагааг зохицуулах, дэмжлэг үзүүлэх;

27.1.4.стандартчиллын техникийн хорооны саналыг үндэслэн дэд хороог байгуулах, өөрчлөх, үйл ажиллагааг зохицуулах, дэмжлэг үзүүлэх;

27.1.5.Стандартчиллын техникийн ны дүгнэлтийг үндэслэн стандартыг батлах, хүчингүй болгох, улсын бүртгэлийн дугаар олгох, бүртгэх, албан ёсны эхийг хадгалах, олон нийтэд мэдээллэх, түгээх;

27.1.6.тохирлын үнэлгээг энэ хуульд заасны дагуу явуулах;

27.1.7.хариуцсан асуудлаар олон улсын байгууллагад гишүүнээр элсэх санал гаргах, олон улс, бүс нутаг, гадаад улсын холбогдох байгууллагатай хамтын ажиллагааг хөгжүүлэх, тохирлын үнэлгээний үр дүнг харилцан хүлээн зөвшөөрөх;

27.1.8.хариуцсан асуудлаар төлбөртэй ажил, үйлчилгээ эрхлэх, сургалт явуулах;

27.1.9.энэ хуульд заасан мэдээллийн санг бүрдүүлэх, ашиглах, удирдах, хяналт тавих;

27.1.10.энэ зүйлийн 27.1.9-д заасан ажил, үйлчилгээг аж ахуйн нэгж, байгууллага, төрийн бус байгууллагаар гэрээний үндсэн дээр гүйцэтгүүлэх;

27.1.11.стандартчилал, техникийн зохицуулалт, тохирлын үнэлгээний онолын суурь судалгаа хийх, эрдэм шинжилгээний ажлын үр дүнг үйлдвэрлэл, үйлчилгээнд нэвтрүүлэхэд дэмжлэг үзүүлэх;

27.1.12.чанартай бүтээгдэхүүн үйлдвэрлэгчийг алдаршуулан үндэсний чанарын шагнал олгох үйл ажиллагааг зохион байгуулах;

27.1.13.стандартчилал, техникийн зохицуулалт, тохирлын үнэлгээ, баталгаажуулалтын тогтолцооны уялдаа холбоог хангах;

27.1.14.стандартчилал, техникийн зохицуулалт, тохирлын үнэлгээг холбогдох төрийн болон бусад байгууллагад чиглэл, зөвлөмж өгөх, хамтын ажиллагааг зохион байгуулах;

27.1.15.тохирлын үнэлгээний тогтолцооны үр нөлөө, үр ашигт дүн шинжилгээ хийж, сайжруулах санал боловсруулах;

27.1.16.үндэсний болон олон улсын стандартын үйл явцын мэдээллийг тухай бүр олон нийтэд нээлттэй хүргэх;

27.1.17.Олон улс, бүс нутаг, гадаад орны стандартчиллын байгууллагаас хүчингүйд тооцсон, шинэчлэгдсэн, нэмэлт өөрчлөлт оруулсан үндэсний болгосон стандартын мэдээллийг төрийн захиргаа, төрийн захиргааны төв байгууллагуудад тогтмол хүргэх;

27.1.18.үндэсний болгон баталсан олон улс, бүс нутаг, гадаад орны стандартчиллын байгууллагын стандарт хүчингүй болсон тохиолдолд тухайн стандартыг Стандартчиллын техникийн хороогоор хэлэлцэж хүчингүй болгох.

27.2.Аймаг, нийслэл дэх Стандартчилал, тохирлын үнэлгээний байгууллагын даргыг Төрийн албаны тухай хуульд заасны дагуу сонгон шалгаруулж аймаг, нийслэлийн Засаг даргатай зөвшилцсөний үндсэн дээр Стандартчилал, тохирлын үнэлгээний төрийн захиргааны байгууллагын дарга томилж, чөлөөлнө.

28 дүгээр зүйл. Аймаг, нийслэл дэх стандартчилал, тохирлын үнэлгээний төрийн захиргааны байгууллага

28.1.Аймаг, нийслэл дэх стандартчилал, тохирлын үнэлгээний төрийн захиргааны байгууллага нутаг дэвсгэрийн хэмжээнд дараах чиг үүргийг хэрэгжүүлнэ:

28.1.1.энэ хуулийн хэрэгжилтийг хангуулах ажлыг зохион байгуулах;

28.1.2.тохирлын үнэлгээг энэ хуульд заасны дагуу явуулах;

28.1.3.Стандартчилал, тохирлын үнэлгээний төрийн захиргааны байгууллагын зөвшөөрснөөр гадаад улс, бүс нутгийн хэмжээнд хамтран ажиллах;

28.1.4.хариуцсан асуудлаар төлбөртэй ажил, үйлчилгээ эрхлэх, сургалт явуулах, олон нийтийн мэдлэгийг дээшлүүлэх, сурталчлах;

28.1.5.энэ хуулийн 32 дугаар зүйлд заасан мэдээллийн санг бүрдүүлэх, хөгжүүлэх;

28.1.6.иргэн,хуулийн этгээд, төрийн бус байгууллагад стандарт боловсруулах талаар арга зүйн зөвлөгөө өгөх, байгууллагын стандартыг бүртгэх;

28.1.7.стандартчилал, техникийн зохицуулалт, тохирлын үнэлгээний чиглэлээр төрийн хяналт шалгалтын байгууллага, эрх бүхий албан тушаалтантай хамтран ажиллах.

29 дүгээр зүйл. Стандартчилал, техникийн зохицуулалт, тохирлын үнэлгээний салбар дундын зохицуулалт

29.1.Хүн, малын эрүүл мэнд, хүрээлэн байгаа орчин, бүтээгдэхүүн, үйлдвэрлэлийн аюулгүй байдлыг хангах зорилгоор төрийн захиргааны төв болон төрийн захиргааны байгууллага, хяналт шалгалт хэрэгжүүлэх эрх бүхий байгууллага, аймаг, нийслэлийн Засаг дарга нь хариуцсан чиглэлээр стандарт, техникийн зохицуулалтын хэрэгжилтийг хангуулна.

29.2.Стандартчилал, тохирлын үнэлгээний төрийн захиргааны байгууллага нь салбар дундын уялдааг хангах зорилгоор төрийн захиргааны төв байгууллагатай хамтран дараах үйл ажиллагаа явуулна:

29.2.1.стандарт, тохирлын үнэлгээ, техникийн зохицуулалтын хэрэгжилтэд дүн шинжилгээ хийх;

29.2.2.стандарт, техникийн зохицуулалтын хэрэгжилтийг эрчимжүүлэх ажлыг зохион байгуулах, холбогдох байгууллагад дүгнэлт, зөвлөмж хүргүүлэх;

29.2.3.стандартыг шинэчлэн сайжруулах зорилгоор таван жил хүртэлх хугацаанд шинжлэх ухаан, техникийн түвшинд үзлэг хийх;

29.2.4.стандарт, техникийн зохицуулалтын хэрэгжилтийн талаарх судалгаа, тайлан мэдээг Төрийн хяналт шалгалтын тухай хуульд заасан эрх бүхий байгууллагаас жил бүр гаргуулах;

29.2.5.энэ хуулийн 32 дугаар зүйлд заасан мэдээллийн санг бүрдүүлэх, ашиглах.

29.3.Энэ хуульд заасан тохирлын үнэлгээнд заавал хамруулах бүтээгдэхүүнийг улсын хилээр нэвтрүүлэхдээ тохирлын баталгаатай эсэхэд гаалийн байгууллага хяналт, шалгалт хийнэ.

29.4.Эрх бүхий этгээд тохирлын гэрчилгээг үндэслэн зөвшөөрөл олгох, сунгах үйл ажиллагааг хялбаршуулсан журмаар явуулж болно.

29.5. Төрийн захиргааны төв байгууллага нь тухайн салбарт мөрдөгдөж байгаа стандартыг хянан үнэлж, шаардлагатай стандартыг жил бүр шинэчлэх арга хэмжээг хэрэгжүүлнэ.

29.6.Стандарт, техникийн зохицуулалт боловсруулах, шинэчлэхэд шаардагдах зардлыг төрийн захиргааны байгууллага жил бүрийн батлагдсан төсөвтөө багтаан хэрэгжүүлнэ.

30 дугаар зүйл. Стандартын хяналт

30.1.Бүтээгдэхүүнийг зах зээлд нийлүүлснээс хойших үе шатанд стандарт, техникийн зохицуулалтын хэрэгжилтийн хяналтыг эрх бүхий улсын байцаагч хэрэгжүүлнэ.

30.2.Улсын байцаагч нь хүн, малын эрүүл мэнд, хүрээлэн байгаа орчин, нийтийн ашиг сонирхолд хохирол учруулж болзошгүй бүтээгдэхүүн болон бусад хуулиар хэрэгжүүлэхээр заасан бүтээгдэхүүний тохирлын баталгаатай эсэхэд хяналт тавина.

30.3.Эрх бүхий хяналтын улсын байцаагч нь хяналт, шалгалтын үйл ажиллагаанд баталгаажуулалтын байгууллагын үр дүнг ашиглаж болно.

30.4.Энэ зүйлийн 30.1-д заасан хяналтыг хэрэгжүүлэх улсын байцаагч нь стандартчилал, техникийн зохицуулалт, тохирлын үнэлгээний чиглэлээр сургалтад хамрагдаж, гэрчилгээ авсан байна.

30.5.Энэ хуулийн 14 дүгээр зүйлийн 14.3-т заасан бүтээгдэхүүнийг улсын хилээр нэвтрүүлэхэд дараах үйл ажиллагааг хэрэгжүүлнэ:

30.5.1.хууль тогтоомж, стандартчиллын баримт бичигт заасан шаардлага хангасан бараа бүтээгдэхүүнийг улсын хилээр нэвтрүүлэх;

30.5.2.харилцан хүлээн зөвшөөрөх хэлэлцээрийн дагуу экспортлогч орны итгэмжлэгдсэн байгууллагын хүчин төгөлдөр тохирлын гэрчилгээ, нийлүүлэгчийн мэдэгдэл, түүнтэй адилтгах үр дүн бүхий бүтээгдэхүүнийг улсын хилээр нэвтрүүлэх;

30.5.3.тохирлын үнэлгээнд заавал хамруулах бүтээгдэхүүнээс бусад бүтээгдэхүүнийг холбогдох хууль тогтоомжийн дагуу зах зээлд нийлүүлэх, улсын хилээр нэвтрүүлэх;

30.5.4.хуульд өөрөөр заагаагүй бол энэ зүйлийн 30.5.2-т заасны дагуу хүлээн зөвшөөрөгдсөн, хүчин төгөлдөр тэмдэг, гэрчилгээтэй бүтээгдэхүүнийг зах зээлд нийлүүлэх, Улсын хилээр нэвтрүүлэхэд тохирлын үнэлгээнд давтан хамруулахгүй байх;

30.5.5.тохирлын баталгаатайгаар улсын хилээр нэвтрүүлсэн бараа, бүтээгдэхүүний статистик мэдээллийг стандартчилал, тохирлын үнэлгээний төрийн захиргааны байгууллагад хагас жил тутам ирүүлэх.

30.5.6.стандартчилал, техникийн зохицуулалт, тохирлын үнэлгээний төрийн хяналтыг хэрэгжүүлэх эрх бүхий байгууллага нь хяналтын тайланг энэ хуулийн 27.1-д заасан байгууллагад жил бүр хүргүүлнэ.

30.5.7.энэ зүйлийн 30.5.5-д заасан тайланг нэгтгэн Стандартчилал, тохирлын үнэлгээний асуудал хариуцсан Засгийн газрын гишүүнд танилцуулж, хэрэгжилтийг хангуулна.

31 дүгээр зүйл. Иргэн, хуулийн этгээдийн эрх үүрэг

31.1. Иргэн, хуулийн этгээд нь стандартчилал, техникийн зохицуулалт, тохирлын үнэлгээний талаар дараах эрхтэй:

31.1.1.бүтээгдэхүүн, үйлчилгээний чанарыг дээшлүүлэх чиглэлээр стандарт, менежментийн тогтолцоог нэвтрүүлэх, тохирлын үнэлгээнд хамрагдах;

31.1.2.стандарт санаачлах, боловсруулах;

31.1.3.стандарт, стандартчиллын хөтөлбөрийн төсөлд санал өгөх.

Т

32.1.Стандартчилал, тохирлын үнэлгээ, тохирлын үнэлгээний итгэмжлэлийн нэгдсэн мэдээллийн сан (цаашид “Мэдээллийн сан” гэх)–тай байна.

32.2.Мэдээллийн сан дараах төрөлжсөн сангаас бүрдэнэ:

32.2.1.стандартчиллын баримт бичгийн мэдээллийн сан;

32.2.2.итгэмжлэгдсэн тохирлын үнэлгээний байгууллагын мэдээллийн сан;

32.2.3.баталгаажуулалтын үр дүнгийн мэдээллийн сан;

32.2.4.лабораторийн шинжилгээний үр дүнгийн мэдээллийн сан;

32.2.5.техникийн хяналтын үр дүнгийн мэдээллийн сан;

32.2.6.сорьц тогтоолгон баталгаажсан үнэт металлаар хийсэн бүтээгдэхүүний болон гэрчилгээтэй эрдэнийн чулууны мэдээллийн сан;

32.2.7.баталгаажуулалтын шинжээчийн мэдээллийн сан;

32.2.8.стандарт, техникийн зохицуулалтын хэрэгжилтийн хяналтын мэдээллийн сан;

32.2.9.энэ хуулийн хүрээнд хамаарах бусад.

32.3.Мэдээллийн сан нь нэгдсэн удирдлага зохицуулалт бүхий программ хангамжтай байна.

32.4.Стандартчилал, тохирлын үнэлгээний төрийн захиргааны байгууллага мэдээллийн санг удирдах, хөгжүүлэх, нууцлал, хадгалалт, хамгаалалтын найдвартай байдлыг хангана.

33 дугаар зүйл. Мэдээллийн сангийн бүрдүүлэлт, хөгжүүлэлт

33.1.Энэ хуулийн 32 дугаар зүйлийн 32.2-т заасан төрөлжсөн мэдээллийн санг дараах байгууллагууд бүрдүүлнэ:

33.1.1.стандартчилал, тохирлын үнэлгээний төрийн захиргааны байгууллага;

33.1.2.итгэмжлэлийн байгууллага;

33.1.3.төрийн хяналт шалгалт хийх эрх бүхий байгууллага;

33.1.4.гаалийн байгууллага;

33.1.5.тохирлын үнэлгээний байгууллага;

33.1.6.бусад.

33.2.Энэ хуулийн 33 дугаар зүйлийн 33.1-д заасан байгууллагууд мэдээллийн сангийн мэдээллийг тухай бүр оруулна.

33.3.Мэдээллийн сан нь эрх бүхий байгууллагууд мэдээлэл оруулах, солилцох, хянах нөхцөлийг бүрдүүлж ашиглах боломжтой байна.

33.4.Мэдээллийн санд мэдээлэл бүртгэх, баяжуулах, баталгаажуулах чиг үүргийг энэ зүйлийн 33.1-д заасан байгууллага мэдээллийн үнэн зөв байдлыг хариуцна.

34 дугаар зүйл. Мэдээллийн сангийн ашиглалт, хадгалалт, хамгаалалт

34.1.Мэдээллийн сангийн өгөгдөл нь нээлттэй, хаалттай гэсэн төрөлтэй байх бөгөөд мэдээллийн санд бүртгэгдсэн мэдээллээс төрийн болон албаны, хувь хүн, хуулийн этгээдийн нууцад хамаарах болон олон улсын гэрээ хэлэлцээрт нууцлахаар зааснаас бусад мэдээлэл нь нийтэд нээлттэй байна.

34.2.Мэдээллийн сан бүрдүүлэх, аюулгүй байдлыг хангах хүрээнд стандартчилал, тохирлын үнэлгээний төрийн захиргааны байгууллага шаардлагатай программ хангамж, техник хэрэгслээр хангагдсан байна.

34.3.Мэдээллийн сан үрэгдэх, устгагдахаас бүрэн хамгаалагдсан байх бөгөөд мэдээллийн санг нөөцлөн цахим технологийн дагуу Архивын тухай хууль тогтоомжид заасан хугацаанд хадгална.

34.4.Мэдээллийн сангийн мэдээлэл бодит бус байгаа нь баримтаар тогтоогдвол энэ хуулийн 33.1-д заасан байгууллага залруулгыг хийнэ.

34.5.Мэдээллийн сан хариуцсан эрх бүхий байгууллага, албан тушаалтан мэдээллийн санг бусад этгээдэд шилжүүлэх, хуулиар хүлээсэн чиг үүрэгтээ хамааралгүй зорилгоор ашиглахыг хориглоно.

НАЙМДУГААР БҮЛЭГ

САНХҮҮЖИЛТ

35 дүгээр зүйл. Санхүүжилт

35.1.Стандартчилал, тохирлын үнэлгээний төрийн захиргааны байгууллага, түүний харьяа аймаг, нийслэлийн байгууллагыг улсын төсвөөс санхүүжүүлнэ.

35.2.Энэ хуульд заасан стандартчилал, техникийн зохицуулалт, тохирлын үнэлгээний талаар онолын суурь судалгаа хийх, эрдэм шинжилгээний ажлын үр дүнг үйлдвэрлэл, үйлчилгээнд нэвтрүүлэх зардлыг Засгийн газрын тусгай сангийн тухай хуульд заасны дагуу Үндэсний шинжлэх ухаан, технологийн сангаас санхүүжүүлнэ.

35.3.Стандартчилал, техникийн зохицуулалт, тохирлын үнэлгээний итгэмжлэлийн асуудал эрхэлсэн Засгийн газрын гишүүн нь Төсвийн тухай хуулийн 30 дугаар зүйлд заасны дагуу үндсэн үйл ажиллагааны нэмэлт орлогоос стандартчиллын үйл ажиллагаа, техник, хэрэгсэл, тоног төхөөрөмжийн шинэчлэл, нийт ажилтны нийгмийн асуудлын зардлыг санхүүжүүлнэ.

35.4.Стандартын борлуулалтын орлогоос Стандартчиллын техникийн хороодын гишүүдийн урамшуулал, хүний нөөцийн чадавхыг бэхжүүлэх зардлыг санхүүжүүлнэ.

35.5.Стандартчилал, тохирлын үнэлгээ, тохирлын үнэлгээний итгэмжлэлийн санхүүжилт нь энэ зүйлийн 35.1, 35.2-т зааснаас гадна дараах эх үүсвэрээс бүрдэнэ:

35.5.1.төлбөртэй ажил, үйлчилгээний хураамж;

35.5.2.олон улсын байгууллага, хандивлагч орны хандив, тусламж.

ЕСДҮГЭЭР БҮЛЭГ

ХАРИУЦЛАГА

36 дугаар зүйл. Стандартчилал, техникийн зохицуулалт, тохирлын үнэлгээ, тохирлын үнэлгээний итгэмжлэлийн хууль тогтоомжийг зөрчигчид хүлээлгэх хариуцлага

36.1.Энэ хуулийг зөрчсөн албан тушаалтны үйлдэл, эс үйлдэхүй нь зөрчил, гэмт хэргийн шинжгүй бол Төрийн албаны тухай хууль, Төрийн албан хаагчийн ёс зүйн тухай хуульд заасан хариуцлага хүлээлгэнэ.

36.2.Энэ хуулийг зөрчсөн нь гэмт хэрэг, зөрчлийн шинжтэй бол Эрүүгийн хууль, Зөрчлийн тухай хуульд заасан хариуцлага хүлээлгэнэ.

37 дугаар зүйл. Хууль хүчин төгөлдөр болох

37.1.Энэ хуулийг 2027 оны ... дугаар сарын-ний өдрөөс эхлэн дагаж мөрдөнө.

Гарын үсэг